

## lis Gnovis

■ **UDIN.** Si presente «Lenghis.me»



Joibe ai 21 di Novembar, «ARLeF» e Ufici scolastic regionâl a presentin «Lenghis.me», il strument informatic, cun lezioni, tescj e exercizis, dedicât a la didatiche de lenghe furlane, taliane e inglese, intune prospetive plurilinguistiche. L'iniziativa e je destinade ai insegnants e ai dirigjents des scuelis primariis e secundariis di prin grât. Annalisa Galati e Dario Chialchia a sclariran i contignûts e lis carateristicis dal supuart interatîf a 17, li dal Liceu «Marinelli» di Udin (viâl Leonardo da Vinci 4; [www.scuola.fvg.it/usr/fvg/USRFGV/Iscrizion/2019\\_insegnantiLenghis](http://www.scuola.fvg.it/usr/fvg/USRFGV/Iscrizion/2019_insegnantiLenghis)).

■ **UDIN.** «Suns Europe» 2019

E larà indevant fintremai ai 30 di Novembar la V edizion di «Suns Europe», «Festival des arts tes lenghis minorizadis». I prins apontaments a son tacâts a Romans ai 15 e a Lavarian ai 16. Altris apontaments a saran programâts ai 22, a 21 a Comeliâns cun Tumasch e Massimo Silverio; e ai 23, a 21 a Pagnà cuant ch'è sarà Silvia Michelotti a cjantâ cun Tumasch. Dai 28, il festival al rive a Udin. Il concerti finâl al sarà programât li da teatri «Giovanni da Udine», ai 30 di Novembar, a 21 ([www.sunseurope.com](http://www.sunseurope.com)). Chest an, a presentaran la serade il «rapper» Doro Gjat e la cjantautore ladine Martina Iori. Sul palc si esibissaran artiscj ch'a rivin di Sardegna (Malasorti), País Basc (Mocker's), Gales (Sybs), Cjanton dai Grisons (Mattiu Defuns), isulis Faer Øer (Son of Fortune) e po musiciscj galizians (Ataque Escampe), ocitans (Mauresca Fracas Dub), catalans (Magalí Sare), bas sassons (Leon Moorman) e furlans (Silvia Michelotti). «Suns Europe» al è organizât de cooperative «Informazion Furlane», cul jutori di Regjon, «ARLeF» e «Fondazione Friuli».

■ **SPILIMBERC.** La Diaspore dal mosaic

Ancje chest an, in grazie di «Friuli nel Mondo», 12 zovins de Diaspore in Argjentine, Brasil, Canada e Uruguay a son restâts a Spilimberc fint ai 10 di Novembar, par cjapâ part al X «Cors di introduzion al mosaic», inmaneât de «Scuele Mosaiciscj dal Friûl». Mots de passion artistiche, i arlêfs a àn tornât a strenzi i leams cu lis lidris des sôs fameis, visitant Aculee, Grau, Palme, Spilimberc e Triest e confrontantsi cui mestris mosaiciscj, par dôs setemanis.

■ **GURIZE.** Confront mondiâl su la speleologie

E je partide l'organizazion dal simposi «Alcadi 2020» che dai 30 di Avrîl ai 3 di Mai di an cu ven al profundirà la speleologie e la storie dai studis su la gjeologie e il cjarsim insin a la seconde vuere mondiâl. L'«Union International de Speleologie» i à dât il compit di organizâ la convigne al Centri pes ricercjis sul Cjars «C. Seppenhofer» di Gurize, ch'al à invitat a mandâi contribuzions drenti dal I di Zenâr dal 2020 a la direzion [seppenhofer@libero.it](mailto:seppenhofer@libero.it). La registrazion finâl dai invitat e colarà al I di Març dal 2020.

<b>Joibe 21</b>	Presentazion del B.V.M.	<b>Lunis 25</b>	S. Catarine
<b>Vinars 22</b>	S. Cecilie	<b>Martars 26</b>	S. Lenart
<b>Sabide 23</b>	S. Clement I	<b>Miercus 27</b>	S. Valerian di Aquilee
<b>Domenie 24</b>	Crist Re	<b>Il timp</b>	Ancjemò nêf su lis monts



**Il soreli**  
Ai 21 al iève aes 7.15  
e al va a mont aes 16.30.



**La lune**  
Ai 26 Lune Gnove.

**Il proverbi**  
La robe dal comun  
e je di duç e di nissun.

**Lis voris dal mès**  
Visaitsi di puartâ in ambients cjalts i ulifs,  
i limonârs, i narançars e dutis lis plantis di cjase.

## Presints fra cîl e tiere

Dai 21 ai 24,  
al torne il «Festival  
de Dutrine sociâl»

«V» è sperance tai cii nol vûl di jessi nemis de fedeltât a la tiere. Fasint stât sun ce ch'al è plui grant e definitîf, noaltris cristians o podin e o scugnìn spandi la sperance ancje tes realtâts provisoris, te dimension politiche e tal cjamp des istituzions: par tancj di lôr no 'nd è une forme plui bieie di cheste frase, che Pape Benedet XVI al à publicât te cuvierte dal so libri «Liberare la libertà», par struçâ la «Dutrine sociâl» de Glesie. Cul fin di valorizâ chest grant patrimoni di principis, d'imprescj pe analisi e di propuestis di vite pratiche al torne a Verone, dai 21 ai 24 di Novembar, il «Festival de Dutrine sociâl».

Pe IX edizion, al è stât sielzût il titul «Jessi presints: Polifonie sociâl». «La sfide ch'ò bramìn di frontâ mediant dal Festival – al sclarîs il coordinadôr pre' Adriano Vincenzi, motivant la decision dal titul – e je ch'è di meti adun contribuzions diferentis par passâ dal ricognossiment de impuartance da la presince individuâl a la polifonie sociâl. Cussî o rivin adore di fâ sù une rêl sociâl gnove. Ognidun di nô al è un fil prezios e indispensabil, ma par realizâ la cjase comun de Comunitât al scuén ingropâsi e leâsi cun chei altris fii». Il Festival di Verone al jentre tal progjet integrât di «formazion sociâl cristiane mediant de cognossince e dal profundiment de Dutrine sociâl de Glesie» inmaneât de Fondazione «Segni Nuovi», de clape «Il Lievito» e dai



Verone i da acet al «Festival de Dutrine sociâl»

A ogni Comunitât  
ur covente  
une rêl sociâl,  
dulà che ognidun  
al è fil  
e grop prezios

«Gruppi DSC» ([www.dottrinasociale.it](http://www.dottrinasociale.it)). Tal lûc internet de Fondazione, al è publicât il programe dal Festival, cu la presentazion di pre' Vicenzi (<http://dottrinasociale.it/festival/edizione-2019>). Li dal «Cattolica Center» di Verone, si vierzârà lis voris de convigne a 20.30 di joibe ai 21 di Novembar, scoltant il mes video di Pape Francesc. Po a tacaran i profundiments sun cemût «jessi presints tai teritoris sul confin», su la contribuzion de Dutrine sociâl par creâ «leadership, popul, polifonie sociâl», su l'inovazion da lis rapresentancis mediant de rivoluzion digital, sul puest de solidaritât tal superament des fragilitâts e sun cemût insegnâ la solidaritât, garantint la libertât de selte educative. La cuistion de presince e de polifonie sociâl e sarà frontade ancje confrontante cu lis necessitâts dai ambients de scuete e dal lavôr, des migrazions, de produzion cinematografiche e dal mont dai zovins. Intant dal Festival, e sarâ

proponude la mostre «I 7 pilastri dell'educazione nel pensiero e nell'esperienza di Bergoglio», curade dal jesuit Antonio Spadaro, e il vaticanist Fabio Zavattaro al presenterà il «Premi Imprenditôrs pal Ben comun». La part artistiche de convigne e sarâ insiorade cul spetacul «Musicanti di Brema», par cure de «Accademia dello Spettacolo» di Turin.

Mario Zili

## Udin, si cjante la Messe par furlan

A Udin, la Messe par furlan e ven cjantade sabide ai 23 di Novembar, a 18, li de capele «de Purità», daprûf dal domo (cun Radio Spazio che le trasmet sul moment). E compagnarà la celebrazion la corâl «I Cantori del Friuli. Garzoni e Zardini» di Udin. Al cjantarà messe pre Claudio Bevilacqua, za timp plevan di Tarvis.

## Radio Spazio, una trasmissione sui 20 agns de leç 482

Su Radio Spazio 103 si ricuarde i vincj agns de leç 482 dal 1999 che e tutele e supuarte lis minorancis linguistichis in Italie cuntune trasmission speciâl titulade «Stât e lenghis» dulà che si fasarà il pont su l'aplicazion de leç par chel che inten la lenghe furlane e si cirarà trois par il svilup de lenghe e culture furlanis. Il gjornalist Marco Tempo al à intervistât plui di 20 fra conseîrs regionâi, parlamentârs, operadôrs linguistics, insegnants, professôrs universitaris, regjiscj e dramaturcs par dâ une prospetive realistiche de salût de lenghe e dal sô divignî. Ogni pontade e scandaie un argoment particulâr e une particulâr atenzion e je stade dedicate ae cuistion dal ûs de lenghe intal servizi radiotelevisifs public. «Stât e lenghis» e larà in onde di joibe, tacant dai 28 di Novembar a 11 di matine e in repliche a 5.30 dopomisdî. Tal fin de setemane replichis ancje sabide a lis 11.30 di buinore e domenie a 2.30 dopomisdî. La trasmision e je stade realizade cun il supuart dal Consei regionâl dal Friûl-Vignesie Julie.

